

Date – 27/04/2025
Time - 7:30 -7:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. MZP Lunglei chuan ATL Road siamna tur sum pawh pen nia an hriat, dah let tura sorkar an ngen hun chhunga hmalakna an hmuh loh avangin naktuk thawhtanni atangin Pukpui daiah kawng dan an rel.
2. Catholic kohhran hruaitu Pope Francis vuina hun nimina Vatican City-a neih ruala a Sunna Mass Thianghlim inkhawm Christ the King Cathedral Kulikawn-ah buatsaih a ni.
3. Mizoram Presbyterian Kohhran bial hrang hrangah Bial Inkhawmpui an nei mek a, Baptist Kohhran in Buhfaitham Pathianni an hmang dawn a, Salvation Army pawhin nimin khan Salvation Army din champha phak wawi 108 pualin hun an hmang bawk.
4. Prime Minister Narendra Modi chuan vawiin Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi dawn.

<><><>

ATL ROAD

MZP Headquarters, Lunglei chuan Aizawl-Thenzawl-Lunglei Road siamna tur sum pawh pen nia an hriat, dah let tura sorkar an ngen hun chhunga hmalakna an hmuh loh avangin naktuk thawhtanni atangin Pukpui daiah kawng dan an rel.

MZP Lunglei Executive Emergency Meeting thurel danin Lunglei chuan ATL road siamna tur sum pawh pen dah let tura Sorkar ni 15 hun a pek chhunga engmah hmalakna a awmlah avangin kawng dan an tum tih an sawi a, naktuk thawhtanni, April ni 28, zing dar 7 atangin tiam chin awm lovin Pukpui daiah ATL road dan nise an ti a, kawng dan hian zirlai naupang exam leh rikrum thila duty te erawh a huam dawn lo tih an sawi bawk.

Lunglei leh Aizawl inkar tlan Maxi Cab Welfare te chuan ATL Road siamna tur sum pawh pen a nih avanga MZP hmalakna an thlawp tlat thu sawiin ATL Road an dan chah chhung chuan an Service loh tur thu an sawi a,

Lunglei - Aizawl Maxi Cab Welfare te chuan Thenzawl - Lunglei kawng chhiat zia an hriat chian avangin kawngpui tha a awm thuai theih nana MZP hmalakna an thlawp tlat tih sawiin an service loh avangin mipuite hriatthiamna an ngen thu an sawi bawk.

Voicecast

Aizawl atanga Thenzawl kaltlanga Lunglei panna kawngpui hi hun rei tak a chhiat hnuah a siamthat nana cheng vbch 90 leh nuai 69 ruahman a ni a,

hetihlai hian sawrkarin Aizawl khawpuia kawngpui siamthat nan cheng vbch 45 a pawh pen avangin Lunglei mipuite an lungawilo hle a, kawng hrang hrangah lungawilohna lan tir niin naktuk April ni 28 Thawhtanni atanga tiamchin awmlova ATL kawngpui dan an tum pawh hi Lunglei mipuite atangin thlawp a hlawh hle a ni.

<><><>

REQUIEM MASSES IN HONOR OF POPE FRANCIS

Aizawl Bishop Most Rev Bishop Stephen Rotluanga'n Pope Francis in chanchintha chu rinawmna, huaisenna leh hmangaihna nen nunpui turin mi tin te a duh a ti a, rethei leh chanhai laka hmangaihna lantir chu a thupui ber a ni a ti.

Catholic kohhran hruaitu Pope Francis vuina hun nimina Vatican City-a neih ruala a Sunna Mass Thianghlim inkhawm Christ the King Cathedral Kulikawn-a neih ah he thu hi sawiin Aizawl Bishop chuan Pope Francis chu a nun pum Lalpa leh a Kohhran tan a hmang zo a ti a, Lalpa hmangaihna angchhunga chatuana chawl turin an tawngtai tih a sawi.

Mizoram hmun hrang hrang atangin he hun hmang tur hian an kalkhawm a, Puithiam thahnem tak an tel a, hunah hian Bishop Secretary Rev Fr Jerome Vungbiakdika chuan Pope Francis a chanchin chhiarchhuahna leh sawina hun a hmang a, inkhawm urhsun neih chhonzawm a ni.

<><><>

PASTORAL MEET

Mizoram Presbyterian Kohhran bial hrang hrangah Bial Inkhawmpui neih mek a ni a, nimin khan rorel inkhawm neih niin Bial inkhawmpui hi zanin ah a tiak ang.

Mizoram Synod thuchhuah tarlan danin April 25 (Zirtawpni) chhun lamah Finance Committee leh Nomination Committee thu in zanah Palai Lawmna leh Report Inkhawm neih a ni a, nimin khan Rorel inkhawm neih niin zanah vantlang Pathian Biak inkhawm neih a ni a, Vawiin Pathianni Chawhma, Chawhnu leh Zanah te vantlang Pathian Biak inkhawm neih a ni dawn a ni. Vawiin Chawhnu inkhawmah hian Lalpa Zanriah Sakramen theh a ni dawn a, zan inkhawmah Bial Chairman kalchhuak turten Valedictory Sermon an sawi ang. Pathian Biak Inkhawm hun hrang hrangah thupui sawi tura ruatten thuchah an sawi baw k ang.

Bial Inkhawmpui hi April thla Pathianni vawi 4-naah neih thin a ni a, chutih rualin eng emaw rokhawlhna avanga hmang hma hret leh hmang tlai hret an awm baw k, kum 2023 Synod Report tarlan danin Mizoram Synod hnuai hian Pastor bial 298 awmin kohhran 1,139 a awm mek a ni.

<><><>

BCM RICE COLLECTION

Vawiin hi Baptist Church of Mizoram (BCM) ni pawimawh Buhfaitham Pathianni a ni a, he ni hi BCM hnuaiia Tualchhung Kohhran hrang hrangah hman a ni ang.

BCM thuchhuah tarlan danin Buhfaitham Pathianni pual hian thupui intawm “Lalpa Krista rawng in bawl a nih hi” tih chu hman a ni dawn a, zing inkhawmah thuchah sawituin thupui thlansa hmangin thuchah an sawi bakah Buhfaitham chanchin inhrilhriatna leh tualchhung kohhran Buhfaitham report te ngaithla-in infuihtharnate neih a ni baw k ang.

BCM-in buhfai a tham tan kum hi F.W Savidge (Sap Upa) Report-a a lan dan chuan kum 1915 a ni a, Kum 1973 Assembly chuan Buhfaitham rawngbawl na chu Tualchhung Kohhran kutah dahin Baptist Kohhran Hmeichhe Pawl ten an khawn a, Sum tling khawm te chu Tualchhung Kohhran kaltlangin Ram thim (Mission) lamah chhûn luh thin a ni.

BCM Finance Department-in a tarlan danin kum 2024-2025 Financial Year chhunga Buhfaitham atanga BCM sum hmuh zat chu a vaiin - Rs.11,89,80,949.00/- (Nuai sangkhat za sawmriat pakua, singriat zakua sawmlipakua a ni).

Voicecast

Buhfaitham lo chhuah dan hi tunhma chuan Kum 1908-ah Khasi rama nu pakhat rilruah a chaw chhum apiangin buhfai veikhat lek lek in dah ila, Kristian tinin kan tih chuan nasa takin hna athawk thei ang tih rinna a lo piang a. A hnu reilote chhungin kohhran pawhin a thatzia an hre ta a. Khasi ram pawh a luan chhuak ta thuai a, hei hi Mizoram pawhin lo hriain tun thlengin Kohhran hrang hrang ten an chhonzawm a, rawngbawl na pawimawh tak niin he ni pual hian Buhfaitham lama hmasawn zel nan infuihthar thin a ni.



SALVATION ARMY CELEBRATES 108TH ANNIVERSARY

Salvation Army, India Eastern Territory te chuan Mizorama Salvation Army din champha phak vawi 108-na pualin nimin khan khawtlan tana thil tha tiin hna an thawk.

Mizoram a Salvation Army din champha pual hian Mizoram hmun hrang hranga Salvation Army Corps leh Society hrang hrangte chuan khawtlang tan thil tha tihna hunah hmangin, veng chhung thianfai in an hnatlan bakah mi harsa tanpuiin an luang chhuak baw k a, Corps thenkhat chuan Mizoram a Salvation Army dintu Pu Kawlkhuma thlanah hun an hmang baw k a ni.

Salvation Army hi kum 1917 April ni 26 khan Pu Kawlkhuma chuan Mizoramah a din a, mi harsa te tanpui leh thlaraubo chhandam chu an kohhran thil tum bulpui ber a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM MANN KI BAAT

Prime Minister Narendra Modi chuan vawiin Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 121-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>